

Regional News Unit AIR Aizawl
Thursday, April 23, 2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Larsap General (Retd) Vijay Kumar Singh a'n thalaite chu ram nghahfak anni tih sawiin thiamna tihpun kawngah mipui nawlpui kawm tama ngaihven peih chu inzirna tha tak anih thu a sawi.
- Larsap General (Retd) Vijay Kumar Singh a'n ram venhim kawngah awmze nei taka tanrual a pawimawh thu sawiin sawrkar anga hmachhawn turin a mal maia kal lova thawhhona tha nena hmachhawn a tul thu a sawi.
- Tukin dar 7 atang khan West Bengal Assembly inthlan thawhkhatna leh Tamil Nadu Assembly inthlan vote thlak tan a ni.
- Sawrkar laipui chuan Promotion and Regulation of Online Gaming Rules 2026 chu thlaleh ni 1 atanga hman tan turin hriattirna a chhuah.



YOUTH FESTIVAL 2026

Larsap General (Retd) Vijay Kumar Singh a'n thalaite chu ram nghahfak anni tih sawiin thiamna tihpun kawngah mipui nawlpui kawm tama ngaihven peih chu inzirna tha tak anih thu a sawi.

Larsap hian nimin khan ICAFI University Mizoram leh Tourism Department tangkawp buatsaih, Youth Festival (Univoyage) 2026 chu ICAFI University Mizoram Campus, Durtlang North, Aizawlah a hmanpui a, thalaite tih phur nana topic pawimawh tak tak zirna hun, Youth Festival 2026 buatsaih a ni chu lawmawm a tih thu sawiin, an hlawkpui ngei a beisei thu a sawi a. Thalaite chu ram nghahfak an nih thu leh ngaihven an tul thu sawiin, hna zawn leh siam nana pawimawh tak, thiamna inzirtirna leh peipunna lam hawi zirtirna ngaih pawimawh a tul thu a sawi a. Mipui nawlpui kawm tama ngaihven peih chu inzirna tha tak anih thu a sawi baw.

Larsap chuan tourism sector tihchangtlun nana pawimawhte tarlangin, khualzin hip tam turin hmanraw tihchangtlun leh boruak duhawm zawk siam bak Mizoramin mamawh dang a neih loh thu sawiin, sik leh sa nuam, hmun mawi leh boruak thianghlim nei anihna chu tourism tihhmasawn nana tha tak a ni, a ti a. Leilung leh a chhunga cheng nena inrem thlap khualhip dan kalpui thiam a tul thu a sawi baw a. Thalaite chu nuam ti tak chung a thiam thil zir tura chahin, Youth Festival chuan Mizoram leh a chhunga chengte tan rah duhawm tak a thlen ngei a beisei thu a sawi baw.

ICFAI University Mizoram Vice-Chancellor Prof Ginlianlal Buhiril chuan hun hman hi kaihruiin inlawmna thu a sawi a. Pi Irene Zohlimpuli Chongthu, Addl. Secretary, Tourism Department, Govt. of Mizoram; Padma Shri Patricia Mukhim, Editor, Shillong Times leh Dr. Theyiesinuo Kreditsu, Kohima, Nagaland te hnen atangin thusawi ngaihthlak niin Sawi hona leh zawhna leh chhanna hu hman a ni a.

Youth Festival (Univoyage) 2026 hi ni hnih awh niin, thupui atan "Exploring Diversity, Strengthening Bonds" tih chu hman a ni.

<><><>

MP

Rajya Sabha MP Pu K. Vanlalvena chuan Mizo hnaathlak tam takte ti hrangtu chu tawng inang lo a ni a ti.

Thawhlejni-a New Lamka EBC Centenary Hall-a Zofate Insuihkhawm Seminar a hmanpuinaah sawiin, Pu K. Vanlalvena chuan Pathian thua pawh tawng hrang vangin Van chena insak tum te tih hran an lo ni tawh tih sawiin, Mizo te pawh tawngin min ti darhtu chu keimahni tih ni loin Pathian tih a ni tih a sawi a. Chuvang chuan, mahni tawng hmangaih vak te, mahni tawng ang thiam ve lo kan en hrang thin te hi sual lian pui a ni hran lo niin a sawi bawk.

Pu K. Vanlalvena chuan Mizo hnaathlak te insuihkhawm a, inpumkhat tak tak tur chuan tawng inhriat tawn a pawimawh a ti a, eng tawng pawh hmang ila tawng in ngaihnepsak tute nen chuan inpumkhat a harsa niin a sawi.

MP Pu K. Vanlalvena chuan Mizote hmun hrang hranga awm te insuihkhawm chu a pawimawh a, hnam inpumkhatna chu Politics a vote zawna avangin a chhiat phah chang awm mahse, inpumkhat nan chuan vote pawh chan ngam a ngai a ni a ti.

Adviser to Chief Minister (Political) Pu Lalmuanpuia Punte pawhin he hunah hian thu sawiin 'Mizo Tawng' chu Duhlian Tawng emaw Lusei Tawng emaw ti a vuah anih chuan Mizo inpumkhatna a that lehzuat a ring tih a sawi.

(Byte: Pu Lalmuanpuia Punte.)

Pu Lalmuanpuia Punte chuan Manipur a Zo-hnaathlak awmte chu Mizoram atanga kaih chhuah nghawt theih an ni lo a, anmahni an au chhuah ve a pawimawh tih a sawi bawk a ni.

<><><>

GOVERNOR

Larsap General (Retd) Vijay Kumar Singh a'n ram venhim kawngah awmze nei taka tanrual a pawimawh thu sawiin sawrkar anga hmachhawn turin a mal maia kal lova thawhona tha nena hmachhawn a tul thu a sawi.

Larsap hian nimin piah khan Indian Institute of Public Administration, New Delhi tlawhin, Advanced Professional Programme in Public Administration (APPPA) course training mek officer-te hmaah thu a sawi a, ram venhim kawngah awmze nei taka tanrual a pawimawh thu sawiin, ram himna tichhe theite sawrkar anga hmachhawn turin a mal maia kal lova, ngaihtuahna thar leh thawh hona tha zawk hmanga hmachhawn a tul thu a sawi a.

Ram tan anih dawn phawt chuan Sawrkar laipui hnuaia ministry atanga district administration thlengin lungruah leh inpawh tlang taka hmalak a ngaih thu a sawi bawk.

Larsap chuan PM Gati Shakti pawimawh zia tarlangin, Ministry hrang hrang, State leh local body-te inkara thawh hona felfai tak avangin hmasawna ruhrel ataka hmuh theiha a awm thu sawiin, hei hian Sawrkar policy leh hmanraw neihte tha taka kalkawp tirin rah chhuah duhawm tak bakah, tul lova sum leh pai deh ral mai mai tur a ven thu a sawi a. Ram hmasawn nan hmalakna huapzo, mitin telna leh tanhona kalpui a pawimawh a ti a. Ram ralmuang leh zalen siam turin inrintawna, mawhphurhna intawm leh tan hona neih a tul thu a sawi bawk.



MALARIA ELIMINATION

Nimin khan Champhai DC Conference Hall-ah District Task Force and Committee on Malaria Elimination-te chu District Bawrhsap Pu Mohammed Aaqib, hovin an thu khawm a.

Meeting-ah hian Malaria do letna kawnga hmalakna tur hrang hrang thisen lak uar te, thosi hlo kah tam te, Kohhran leh Line Department hrang hrangte nena Awareness Campaign uar lehzuah neih dan tur te, tui leak avanga tuitling leh thosi pianna hmun awm thei lakah mipuite zirtirna uar zawk neih dan tur leh Doctors Without Borders te nena thawhhona tha tak neih chhonzawm zel a pawimawh dan te sawiho a ni bawk.



KOLASIB DC

Kolasib Bawrhsap Pu H. Dolianbuai-an nimin khan Vairengte leh a chhehvela thenawm state Assam nena inrina hmun pawimawh a tlawh.

DC hian 3rd Battalion MAP tlawhin ramri venhimna (border security) chungchang leh an mamawhte a sawipui a. 1st Battalion IR, Vairengte tlawh chhonzawm lehin an camp mamawh leh thil pawimawh hrang hrangte an sawiho bawk. Assam leh Mizoram ramria 5th Battalion IR duty te awmna hmun, Sabual tlawh chhonzawm lehin, ramri a buaina leh harsatna an tawh thin te sawiho a ni a. DC chuan ramri vengtute inpekna a fak thu sawiin, huaisen leh taima taka hna thawk zawm zel turin a fuih nghal bawk.

Hemi hnu hian National Highway kawng thlur li a kal tur (fourlane) laih mek chu Vairengte thlengin a hmunah a enfiah a. NHIDCL hotuten lo tawiaamin, hnathawh mek dan kalphung leh hmasawn dan te lo hrilhfiah in, an mamawh leh hna chak zawka an kalpui theihna tur te DC hnenah hian an thlen nghal a ni.



KHAWZAWL CDPO

Khawzawl CDPO office ah nimin khan Poshan Pakhwada pualin Nu leh Naupang hriselna ngaih pawimawh kawnga inzirtirna hun hman a ni.

Govt. Middle School II Khawzawl-a hun hmanah hian CDPO Pi Esther Laltlinpuii chuan naupangten phone en nasa lutuk lo a, tangkai zawk a hmang tura fuihin infiamna lam insawizawi bakah eitur hrisel tha ei tam turin a fuih a ni.

He hun ah hian Resource Person ah Pu Francis Lalruatluanga SDEO Khawzawl chuan power point hmangin presentation a pe a. Naupang te phone khawih hunbi insiam a, zirna lam ngaihsan a, lehkhabu chhiar tam tur Mahni taksa enkawl uluk tur leh tlawmngaihna nunpui zel turin a fuih bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PwD ASSESSMENT & CERTIFICATION

Lunglei District-a Thenhlumah nimin khan Social Welfare, Women & Child Development Department leh Health & Family Welfare Department hmalakna hnuaiah Vohbikte tan Assessment & Certification Camp buatsaih a ni a. He camp-ah hian khaw 7 atangin Disability Certificate / UDID pek chhuah tur vohbik 62 te endik an ni.

He Assessment & Certification Camp hi Dr. Joseph Lalrindika Chongthu kaihhruaina hnuai neih a ni a, Vohbikte tan Assessment & Certification Camp hi vawiinah Lungsen II ah neih tur niin naktuk hian Tlabung ah neih chhonzawm tura ruahman a ni.

<><><>

ELECTION

Tukin dar 7 atang khan West Bengal Assembly inthlan thawhkhatna leh Tamil Nadu Assembly inthlan vote thlak tan a ni a. Inthlanna hmunah te hian venhimna khauh taka kalpui a ni a.

West Bengal ah chuan inthlan thawhkhatnaah Assembly bial 152 ah vote thlak a ni a. Candidate hi 1478 awmin an zingah hian hmeichhia 167 an awm a. Polling Stations 44376 siam a ni a. Heng zinga 5600 hi hmeichhiate chauhin an enkawl Polling station a ni.

Tamil Nadu-ah chuan assembly bial 234 ah vote thlak a ni a. Polling station 75065 awmin Voter vaibelchhe 5 nuai 73 sing li sang 3 leh 291 ten thawhkhata neih turah an aiawh roreltu an thlang a ni.

<><><>

ONLINE GAMING RULES

Sawrkar laipui chuan Online-a game khelh tihlar leh inkaihhraina tur dan Promotion and Regulation of Online Gaming Rules 2026 chu thlaleh ni 1 atanga hman tan turin hriattirna a chhuah. He inkaihhraina hian a tum ber chu online-a game khelh thin te rualkhai taka kaihhraina tha tak siam leh khua leh tuite dikna hum leh an sum leh pai heu tur vensak te, a hmangtute chanvo vawnhim sakte a ni.

<><><>